

Eluned Morgan AS
Y Gweinidog Iechyd a Gwasanaethau
Cymdeithasol
Llywodraeth Cymru

08 Gorffennaf 2022


Annwyl Eluned

Gwaith dilynol ar argymhellion Pwyllgor Iechyd, Gofal Cymdeithasol a Chwaraeon y Bumed Senedd:
Hepatitis C: Cynnydd tuag at ei ddileu yng Nghymru

Ym mis Mehefin 2019, cyhoeddodd Pwyllgor Iechyd, Gofal Cymdeithasol a Chwaraeon y Bumed Senedd yr adroddiad a ganlyn: [Hepatitis C: Cynnydd tuag at ei ddileu yng Nghymru](#). Yn ein cyfarfod ar 4 Mai, gwnaethom gytuno i ysgrifennu atoch i ofyn am y wybodaeth ddiweddaraf am yr argymhellion a wnaed gan y Pwyllgor a'n rhagflaenodd.

Byddem yn ddiolchgar pe gallech ymateb i'r materion a godir yn yr atodiad erbyn **1 Medi 2022**.

Yn gywir,



Russell George AS

Cadeirydd y Pwyllgor Iechyd a Gofal Cymdeithasol

Croesewir gohebiaeth yn Gymraeg neu Saesneg. We welcome correspondence in Welsh or English.

Atodiad: argymhellion a wnaed gan Bwyllgor Iechyd, Gofal Cymdeithasol a Chwaraeon y Bumed Senedd yn yr adroddiad a ganlyn: Hepatitis C: Cynnydd tuag at ei ddileu yng Nghymru

Cefndir

Roedd Hepatitis C yn destun ymchwiliad byr, penodol a gynhaliwyd gan Bwyllgor Iechyd, Gofal Cymdeithasol a Chwaraeon y Bumed Senedd ym mis Mehefin 2019. Un o'r prif gymhellion a sbardunodd yr ymchwiliad hwn oedd ceisio deall yn well pa mor debygol yw hi y bydd Llywodraeth Cymru yn cyflawni targedau Sefydliad Iechyd y Byd yn y maes hwn, sef sicrhau gostyngiad o 90 y cant yn nifer yr achosion o hepatitis feirysol, a gostyngiad o 65 y cant mewn marwolaethau oherwydd hepatitis B a C erbyn 2030.

Yn ei adroddiad, gwnaeth y Pwyllgor bedwar argymhelliad a oedd yn ymwneud â materion amrywiol, gan gynnwys: strategaeth ddileu genedlaethol, gynhwysfawr ar gyfer Hepatitis C; cynnal ymgyrch codi ymwybyddiaeth wedi'i thargedu a darparu hyfforddiant i weithwyr iechyd proffesiynol; ysgrifennu at Gyfarwyddwyr Cyllid a Phrif Weithredwyr y byrddau iechyd mewn perthynas â thargedau; a darparu buddsoddiad ychwanegol er mwyn gwella'r profion am Hepatitis C mewn carchardai yng Nghymru.

Ym mis Awst 2019, derbyniodd Llywodraeth Cymru argymhelliad 3, a derbyniodd argymhellion 1, 2 a 4 mewn egwyddor.

Ymatebodd yr Ymddiriedolaeth Hepatitis C i'r ymgynghoriad a gynhaliwyd gennym ar ein blaenoriaethau ar gyfer y Chweched Senedd (a ddaeth i ben ym mis Medi 2021). Dywedodd yr Ymddiriedolaeth wrthym mai ychydig o gynnydd sydd wedi'i wneud ar argymhellion y Pwyllgor blaenorol, gan nodi bod effeithiau COVID-19 wedi atal ymhellach y cynnydd sy'n cael ei wneud tuag at ddileu'r feirws. Dywedodd hefyd fod gwasanaethau hepatitis C yng Nghymru wedi cael eu heffeithio'n fwy na'r gwasanaethau a ddarperir yng ngwledydd eraill y DU yn ystod y pandemig:

"While treatment rates fell markedly in all nations in the immediate wake of the first wave, by July 2020 treatment initiations in England were 42% lower than the previous year. By contrast, by August 2020 treatment initiations in Wales were still 71% lower than the year before".

Cyfeiriodd yr Ymddiriedolaeth at y Strategaeth Adfer ar gyfer Feirysau a Gludir yn y Gwaed sy'n cael ei datblygu gan Iechyd Cyhoeddus Cymru. Nododd hefyd mai Cymru bellach yw'r unig wlad yn y DU nad oes ganddi darged i ddileu hepatitis C cyn targed Sefydliad Iechyd y Byd yn 2030. Mae Lloegr a Gogledd Iwerddon wedi gosod uchelgais i ddileu'r feirws erbyn 2025, ac mae'r Alban wedi pennu targed mwy uchelgeisiol fyth, sef dileu'r feirws erbyn 2024.

Byddem yn ddiolchgar pe gallech ymateb i'r materion a godir isod erbyn **1 Medi 2022**.

1. A wnewch chi ddarparu'r wybodaeth ddiweddaraf am y broses o weithredu pob argymhelliad, gan gynnwys y camau a gymerwyd, unrhyw gamau arfaethedig, a, lle bo'n briodol, manylion ynghylch yr adnoddau cysylltiedig a'r amserlenni arfaethedig, a manylion ynghylch sut y mae effaith a chanlyniadau'r camau gweithredu a'r gwariant yn cael eu gwerthuso a'u mesur (neu sut y bydd hynny'n digwydd)?

Materion eraill

2. A wnewch chi ddarparu gwybodaeth a data ynghylch y triniaethau a ddechreuwyd ers 2020?
3. A wnewch chi ddarparu'r wybodaeth ddiweddaraf am y Strategaeth Adfer ar gyfer Feirysau a Gludir yn y Gwaed ac unrhyw gymorth ehangach a ddarperir gan Lywodraeth Cymru?
4. A wnewch chi gadarnhau targed Llywodraeth Cymru ar gyfer dileu'r feirws (ac a oes ganddi unrhyw gynlluniau i bennu targed mwy uchelgeisiol, yn unol â'r gwledydd eraill)? Hefyd, a wnewch chi gadarnhau a yw Llywodraeth Cymru yn hyderus y bydd yn cyflawni ei tharged?